



*Rabu , 22 September 2021*  
**Ogen: Matius 5:43-48**



*"Dan Kam Anak Dibata"*



**I**bas perdalinen kegeluhen Jesus bas doni, melala kal kalak si rate segat nengdangi Jesus e. Mulai kin icikuraki, ibenter, iciduri ras sidebanna. I bas perbahanen manusia man Jesus e, la pernah sekali pe ibalas Jesus alu perbahanen si mejin. Tapi, justru ertambah-tambah kekelengen si ibereken Jesus man manusia. Penungkunenna man banta i bas renungenta wari enda, ngasup nge kita ngusih perbahanen Jesus e man saph-saph kita manusia? Uga nge sedekah enda perbahanenta, adi lit kalak si segat atena kita? Jesus nggo ncidahkan kerna perbahanen selaku IA anak Dibata. Kitab Matius 5:43-48 enda ngajari kita engkelengi imbang-imbangta. Jesus mpeseh ajaren enda man ajar-ajarNa, segelah bas perdalinen kegeluhen ajar-ajarNa, la pernah ibalasNa kalak si rate segat baNa (imbang-imbangNa). Ayat 44 "***Kelengilah imbang-imbangdu, janah ertotolah man Dibata kerna kalak si erbahanca kam ngenanami kiniseran.***" Ngasup nge kita? harus ngasup! Sabap "*ban kam Anak Dibata*" (tema renungenta).

Adi ikataken anak Dibata berarti biak kegeluhen Jesus harus lit sipakeken bas kegeluhenta. Berat memang, tapi adi si pindo penampat Dibata, la lit si metahat. Mari, sendah siban tekadta, nggeluh ngkelengi imbang-imbangta. Adi nggo si kelengi ia, tapi la rulih kekelengenta e, tetaplah totoken, segelah kai pe si ibahanna, Tuhan si mpekena-kena ia. Ban kam Anak Dibata e, pasti kekelengenndu e ngasup ngalemi salah kalak sideban, ban kam Anak Dibata e, pengasup Dibata kam ngaloken kalak si la bagi ukurndu, perban kam Anak Dibata e, la ipediat Dibata kam ngaloken perbahanen si mberat arah imbangdu nari, perban kam Anak Dibata e, pasti Dibata nampatii kam guna lanai mbalas kerna perbahanena si la bagi ukur. Ingat, Jesus nggo melala ngenanami kiniseran bas doni arah perbahanen manusia nari. Ula mbiar, Dibata ras kita guna mereken kekelengen si mbelin.